



Blagodat poživljenja do ramazana (Meka)

Hatib: dr. Abdullah ibn Avad el-Džuheni

7. ramazan 1446. po Hidžri / 7. mart 2025.

Hvala Allahu, Plemenitom i Milostivom, Onome Koji obilato daruje blagodatima i dobročinstvima, Onome Koji je Svojim robovima vjernicima propisao post u mjesecu ramazanu. Svjedočim da nema drugog boga osim Allaha, jedinog, Koji nema sudruga, Zaštitnika bogobojaznih i čestitih, i Koji počastio ummet Muhammeda, sallallahu alejhi ve sellem, mjesecom ramazanom, i svjedočim da je naš predvodnik i vjerovjesnik Muhammed, sallallahu alejhi ve sellem, Njegov rob i poslanik, najbolji čovjek koji je klanjao, postio i obilazio Kabu. Neka su Allahov mir i blagoslovi na njega, na njegovu porodicu i njegove ashabe, zvijezde upute i svjetiljke u tami.

Savjetujem vas da se bojite Allaha, džellešanuhu, i da Mu budete pokorni, jer On je Sveznajući, uz vas je u svakom vremenu i na svakom mjestu. Znaite da je malo djela uz bogobojaznost mnogo, a mnogo djela bez bogobojaznosti malo. Držite se stubova vjere i ogranka imana, jer nema spasa niti uspjeha na ovom i onom svijetu osim kroz bogobojaznost i vjeru u Allaha, džellešanuhu. Iskoristite trajanje ovog života prije nego što prođe i požurite s dobrim djelima, jer ste u najčasnijim trenucima za to.

Čovjek na ovom svijetu neće živjeti vječno niti će ostati. Došao je iz nepostojanja i vraća se u nepostojanje. Sati koje prolaze na ovom svijetu čine se kao trenuci, trenutak za trenutkom, sve dok čovjek ne stigne do svoje krajnje tačke. Ovo je osjećaj koji svako od nas nosi. Sjetimo se muslimana koji su prošle godine željno iščekivali ramazan, mjesec dobrote i blagoslova. Njihovi životi su završeni, djela su im prekinuta, i sada su na mjestu gdje su im ostala samo njihova djela. Ono što su ostavili iza sebe jesu trajna sadaka, korisno znanje ili čestito dijete, koje dovi za njih, i svi mi ćemo postati ono što su oni postali, i završiti tamo gdje su oni završili.





I evo, došao je ramazan ove godine, nakon što smo mnogo toga zaboravili, i posvetili našim dunjalučkim brigama. Ramazan se vratio, a Allah nam je odredio da se i mi njemu vratimo kako bismo svjedočili njegove sjajne dane i oživili njegove blagoslovljene noći.

Poštovani vjernici, jedna od najvećih Allahovih, džellešanuhu, blagodati Njegovim vjernim robovima jeste što im je prije nekoliko dana omogućio da dočekaju jednu od sezona velikog dobra – mjesec ramazan, prepun milosti i blagoslova. To je mjesec u kojem se postači raduju, a trudbenici na Allahovom putu stječu nagrade. U ovom mjesecu farzovi imaju uvećanu vrijednost u odnosu na druge mjesece, a dobrovoljni ibadeti vrijede koliko farzovi u drugim mjesecima. Ovo je mjesec velikodušnosti, sadake, oprosta i brisanja grijeha.

Allah nam je propisao post u njemu, a Njegov Poslanik, sallallahu alejhi ve sellem, preporučio nam je noćni namazu u njemu. Naš Poslanik, sallallahu alejhi ve sellem, običavao je obradovati svoje ashabe riječima: "Došao vam je mjesec ramazan, mjesec blagoslova. Allah u njemu spušta milost, briše grijeha, prima dove i ponosi se vama pred Svojim melekima. Pokažite Allahu ono najbolje od vas, jer nesretan je onaj kome u ovom mjesecu bude uskraćena Allahova milost." (Hejsemi, Medžmeuz-zevaid, od Taberanija)

Također je rekao: "Kada nastupi ramazan, otvore se džennetska vrata, zatvore se džehennemska vrata i šejtani bivaju povezani u okove." (Buhari i Muslim)

Jedan od vidova Poslanikove upute, u mjesecu ramazanu, koja je bila najpotpunija, bilo je povećanje svih vrsta ibadeta. Bio je najdarežljiviji čovjek, a njegova darežljivost posebno je dolazila do izražaja u ramazanu. Tada je povećavao sadaku, dobročinstvo, učenje Kur'ana, namaz, zikr i itikaf.

Podsticao je na obavljanje umre u ramazanu i rekao je jednoj ženi ensarijki: "Zašto nisi obavila hadž s nama?", a ona je odgovorila: "Imali smo samo jednu devu, koju su koristili jedan čovjek i njegov sin, a mi smo na njoj donosili vodu." Poslanik reče:





“Kada nastupi ramazan, obavi umru, jer umra u ramazanu vrijedi kao hadž.”
(Muttefekun alejhi)

Poslanik, sallallahu alejhi ve sellem, posvećivao je posebnu pažnju ibadetu u ramazanu, kao ni u jednom drugom mjesecu.

Zahvalite Allahu na ovoj blagodati, pokažite Mu zahvalnost ozbiljnošću i trudom, ispunjavajući njegovo vrijeme raznim ibadetima, i čuvajte se pogrešaka i grijeha.

Ovo je odabrano vrijeme, pa gdje su oni koji ga žele iskoristiti, i ovo je sezona unosne trgovine, pa gdje su oni koji žele trgovati?

Poslanik, sallallahu alejhi ve sellem, rekao je: “Allah, džellešanuhu, kaže: ‘Svako djelo sina Ademovog pripada njemu, osim posta. Post je Moj i Ja za njega posebno nagrađujem. Post je štit. Kada neko od vas posti, neka ne govori ružne riječi i neka se ne svađa. Ako ga neko uvrijedi ili zapodjene kavgu, neka kaže: ‘Ja postim.’ Tako mi Onoga u Čijoj je ruci Muhammedova duša, zadah postača draži je Allahu na Sudnjem danu od mirisa miska. Postač ima dvije radosti: radost pri iftaru i radost kada sretne svog Gospodara zbog svog posta.’” (Buhari i Muslim)

Neka nas Allah pomogne u postu i noćnom namazu u ovom mjesecu, s vjerom u Njega i nadom u Njegovu nagradu. Također, neka nam oprostí naše grijeha i pokrije naše sramote, te nam podari Svoju milost na Danu ispitivanja.

Oporučujem sebi i vama bogobožnost i da požurite ka Allahovom oprostí i Džennetu, koji je prostran kao nebasa i Zemlja, i pripremljen je za bogobožne.

Znajte, Allah vam se smilovao, da se ovaj vaš mjesec već počeo smanjivati, pa povećajte svoja dobra djela, kao da je već na izmaku. Svaki mjesec može se nadoknaditi, ali kako nadoknaditi ramazan? Sretan je onaj ko promišlja o svom stanju, oprezno pristupa prilici prije nego što je izgubi i iskoristi darove svoga Gospodara u darežljivosti, milosti i dobročinstvu. Stoga, povećajte učenje Kur’ana, dijeljenje hrane, davanje sadake siromašnima i siročadima, te čuvajte svoje tijelo od grijeha i pogrešaka.





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA." (PREPOROD)

HUTBE 

Donosite što više salavata na najplemenitijeg među ljudima, jer Allah kaže: "Allah i Njegovi meleki donose salavat na Vjerovjesnika. O vjernici, donosite salavat na njega i šaljte mu selam!" (El-Ahzab, 56)

